

景明刻本鹽邑志林

四十

聖門志卷之四

海鹽呂元善纂輯

西安方應祥

參考

同邑吳麟瑞

兄呂元美

編次

侄呂濬

男呂兆祥

訂閱

孫呂逢時

禮樂

叙曰先王制禮作樂所以通神明正情性合和

邦國而祖洽黔黎者也自姚姒子姪之裔尚或
樸而不文或文而不慙非夫子折衷而定之曷
繇令經曲律呂洋洋纚纚萬世率由而無弊乎
以故上肇炎漢下暨勝國代有祀以隆報稱
明興恪共愈篤禮備四代樂用八佾崇儒重道之
典猗歟休哉昭天地而超今古矣用是標祀典
於首重玉帛祝嘏之遺告也而章服祭期皆禮
之大者故分類而記之至於禮器樂章懼其散
佚也爰稽其典制撫其顛末俾俎豆之司鼓鼙
之吏有所尋而守焉

祀典

漢

高帝十二年過魯以太牢祀孔子詔諸侯王卿相

至郡先廟謁而後從政

此漢以下祀孔子之始亦新官到任謁廟之始

元帝初元元年詔褒成君孔霸以所食邑八百戶

祀孔子

光武建武五年帝過闕里使大司空以太牢祀孔子

明帝永平十五年東巡至魯詣闕里宅廟祀孔子

及七十二弟子

此後世祀孔子弟子之始

聖門志 卷之四
章帝元和二年東巡狩過魯詣闕里以太牢祀孔

子

時帝升廟西面立群臣中庭北面皆再拜帝進爵而後坐作六代之樂大會孔氏男子年

二十以上者六十三人因拜僖郎中并賜孔氏男女金帛僖從還京師

安帝延光三年自泰山過魯祀於闕里

桓帝元嘉二年詔春秋享禮出王家錢給大酒河

南尹給牛羊豕各一大司農給米

靈帝建寧二年詔祀孔子依社稷出王家穀春秋

行禮

三國魏

齊王正始二年帝講論語使太常釋奠以太牢祀

孔子於辟雍

漢以來釋奠之禮始見於此前此皆祀孔子於闕里至是始行太學

晉

武帝泰始三年詔魯國四時備三牲祀孔子

七年皇太子講經親釋奠於太學

此太子釋奠之始

東晉

元帝太興二年皇太子親釋奠先聖於太學廟

明帝太寧三年詔奉聖亭侯孔熒四時祀孔子如

泰始故事

成帝咸康元年帝親釋奠於辟雍

穆帝升平元年親釋奠如故事權以中堂爲太學

聖門志 卷之四 三
武帝寧康三年帝親釋奠於中堂以顏子配享

南宋

文帝元嘉二十二年釋奠孔子牲牢祭器悉依上
公之禮舞六佾設軒懸之樂

北魏

太武始光三年起太學于城東祀孔子以顏回配
太平真君十一年車駕南伐至鄒山以太牢祀先
聖

顯祖皇興二年遣中書令高允以太牢祀孔子

孝文帝延興二年詔孔子廟有婦女合雜巫覡淫

祀者禁之

孝文帝太和十六年詔宣尼廟別勅有司享薦之

禮

有司廟享始此

孝文帝太和十九年帝如魯城祀孔子

改封二十入世孫孔

靈珍爲崇聖侯拜孔氏四人顏氏二人官此顏子錄後之始

南梁

武帝天監八年皇太子釋奠先聖

自司議禮云先師在堂義所尊

敬太子宜登阼階以明從師之義若釋奠事訖太子升堂則宜從西堂以明不由阼階之義

北齊

文宣帝天保元年令魯郡以時修葺廟宇遣使致

祭又制春秋二仲行禮每月朔行禮

祭酒領博士及國子

諸學生每月朔日出行事拜孔聖揖顏子此後世朔日行禮之始

是年詔將講於天子先定經於孔父廟講畢釋

奠行三獻禮

陳

宣帝大建三年皇太子釋奠先師

祭酒以下賚帛有差

後主至德三年釋奠於先聖

禮畢設金石之樂會宴王公卿士

隋

文帝初詔國子寺每歲以四仲月上丁釋奠于先

聖先師州縣學以春秋仲月釋奠

此郡縣二仲釋奠之始前

此元魏雖命有司薦享然未名爲釋奠亦無定時也

唐

高祖武德二年詔國子學立周公孔子廟各一所

自曹魏釋奠孔子於辟雍後至元魏始有廟然不知其何時立也至是高祖始詔國子立廟

高祖武德七年帝詣國子學釋奠于先聖先師以

周公爲先聖孔子爲先師配

太宗貞觀二年左僕射房玄齡等議武德中詔釋奠于太學以周公爲先聖孔子配享臣以爲周公尼父俱稱聖人庠序置奠本緣夫子故晉宋梁陳及隋皆以孔子爲先聖顏回爲先師別祀

周公請停周公升孔子爲先聖以顏回配從之

至是始定以孔子爲先聖顏子爲先師高宗永徽中復聖周公師孔子顯慶二年乃以周公配武王而孔子爲先聖

太宗貞觀四年詔州縣皆立孔子廟

此後世郡縣立文廟之始

太宗貞觀十四年帝釋奠於國子學

詔祭酒孔穎達講孝經

太宗貞觀二十年詔皇太子於國學釋奠於先聖

先師皇太子爲初獻國子祭酒爲亞獻司業爲

終獻

舊禮釋奠以博士自爲祭主至是中書侍郎許敬宗等奏祭先聖先師秦漢無文魏

則以太常行事晉宋以學官主祭請自今國學釋奠令祭酒爲初獻祝辭稱皇帝某遣某官司業爲亞獻博士爲終獻州縣以守令爲初獻丞佐爲亞獻博士爲終獻無博士以主簿代之此

後世國學遣官釋奠之始前此蓋學官自祭也而州縣以守令主祭亦始於此

太宗貞觀二十一年詔以左丘明卜子夏公羊高

穀梁赤伏勝高堂生戴聖毛萇孔安國劉向鄭

衆賈逵杜子春馬融盧植鄭康成服虔何休王

肅王弼杜預范甯二十二人代用其書垂於國

胄自今有事於太學並令配享尼父廟堂

此後世以

先儒配享孔子之始太宗詔以諸儒從祀孔子皆其有功於聖人之經者也卜子夏毛萇有功於詩左丘明穀梁赤公羊高有功於春秋伏勝孔安國有功於尚書高堂生戴聖有功於禮王輔嗣有功於易劉向鄭衆杜子春馬融盧植鄭康成服虔王肅賈逵則通有功於諸經者何休杜預范甯則又有功於三傳者然子夏在十哲之列而此又列之者是時七十二子雖列像廟

堂未得享祀惟子夏以有
功於詩得在從祀之列

高宗顯慶三年文宣王廟詔用宣和之舞國子博

士范頽撰樂章

高宗乾封元年封禪還京師車駕過曲阜祠廟祀

以太牢

高宗總章元年贈顏回太子少師曾參太子少保

並配享孔子廟

此後世追贈孔門弟子之始而
以曾參配享亦始於此

獻通考高宗總章元年新唐書睿宗太極元年
俱稱顏子曾子配享則曾子已配孔子矣而玄
宗開元八年李元瓘又以曾子不預配享祀爲
請二十七年孔子正南面獨以顏子配而曾子
不與焉至宋度宗咸淳三年始以曾子子思並
顏子孟子配享其舉其廢不可詳考姑記於此

睿宗太極元年皇太子開講筵親釋奠加贈顏回
太子太師曾參太子太保皆配享

玄宗開元七年皇太子齒胄於學謁先聖詔三獻
皆用胄子

玄宗開元八年司業李元瓘言孔宣父廟顏子配
其像立侍請據禮文合從坐侍又四科弟子閔
子騫等雖列像廟堂不預享祀而范甯等皆霑
從祀請列享在二十二賢之上七十子者則文
翁之璧尚不闕如豈有國庠遂無圖繪請圖形
於壁兼爲立贊曾參以孝受經於夫子請享之

如二十二賢乃詔顏子等十哲爲坐像悉預祀
曾參特爲矮像坐十哲之次圖七十子及二十
二賢於廟壁上以顏子亞聖親爲製贊書於石
閔損以下令當朝文士分爲之贊題其壁

玄宗開元十三年封禪迴詣孔子宅親設奠祭又
遣使以太牢祀墓

玄宗開元二十七年詔追謚孔子爲文宣王南向

坐

先時孔廟以周公南面而夫子坐西牖下貞觀中廢周公祭而夫子位未改至是二京國

子監天下州縣夫子始皆南向

被王者袞冕服兩京樂用宮懸

追贈顏子爲兗公西向配閔子騫冉伯牛冉仲

弓宰我端木子貢冉有仲由言子游卜子夏九

人爲侯曾參等七十三人爲伯東西列侍

文宣之謚

始此亦孔子封王第子封公侯伯之始按鄭曉曰近世多議從祀諸儒而不及十哲十哲直取陳蔡一時與難之賢非孔門定論自開元迄今無敢議者夫有若之言四見於論語大類聖人公西赤志於禮樂有爲邦之才其爲言語政事不優於宰我冉求乎我求言行不必徵諸史傳論語中多有之視二子優劣何如宜進祀二子於殿上改求我廡中

玄宗開元二十八年詔春秋二仲月上丁祭文宣

王以三公攝事

肅宗上元元年歲旱罷諸祀惟太學仍祀文宣王
德宗貞元二年釋奠詔自宰臣以下畢集於國學

每年春秋釋奠祝板御署訖北面而揖

宣帝大中元年宰臣白敏中請賜百縑充享祀

後唐

明宗長興二年復文宣王廟祀

時朱梁喪亂廟祀遂廢故復之

後周

太祖廣順二年親征至兗詣廟再拜左右曰天子

不當拜異代陪臣帝曰夫子聖人也百王取則

安得不拜登墓復拜

按周太祖親征慕容彥超至兗州城將破夜夢一人

狀甚魁異被王者服城陷取委巷入夫子廟在帝豁然曰昨夢殆夫子乎不然何路與廟會因駐驂升堂瞻像一如夢中所見感喜下拜遂躬請闕里拜奠詔畱所奠銀酒器及爐於廟中又